



KOMM. OG REG. DEP	
18 JAN 2005	
04/2771-116	
Ark	013
Avd.	RA / SSA / MAG

Sakshandsamar:

Roar Nesset

E-post: roar.neset@sf-f.kommune.no

Tlf: 57 65 62 71

Vår ref.

Ark.nr.: 04/03849/L.nr: 000609/05

Gje alltid opp vår ref. ved kontakt

Dykkar ref.

Dato

LEIKANGER, 13.01.2005

Kommunal- og regionaldepartementet
Postboks 8112 Dep

0032 OSLO

NOU 2004: 19 "LIVSKRAFTIGE DISTRIKTER OG REGIONER" - FRÅSEGN

Dykkar brev datert 14. oktober 2004.

Fylkestinget i Sogn og Fjordane gjorde i møte 07.01.05 slikt vedtak i saka "NOU 2004:19 "Livskraftige distrikter og regioner" – Fråsegn":

"Innstillinga frå Distriktskommisjonen viser at det er mogleg med ein meir offensiv distrikts- og regionalpolitikk. Innstillinga dokumenterer at Noreg har eit stort handlingsrom i distriktspolitikken. Det er opp til norske politikarar å ta heile Noreg i bruk, gjennom ei aktiv tilrettelegging for å utløyse det verdiskapingspotensialet som finst i alle deler av landet.

1. Sogn og Fjordane fylkeskommune sluttar seg til dei mål og strategiar som ein samla Distriktskommisjon står bak. Regionalpolitikken må vere tilpassa føresetnadene og behova i den enkelte region. Ein målretta distriktspolitikk må kome i tillegg til regionalpolitikken. Distrikts- og regionalpolitiske målsetjingar og resultatkrav må på nytt bakast tydelegare inn i sektorpolitikken. Dei ulike sektorane må sjåast meir i samheng enn i dag.
2. Innanfor dei ulike sektorane (pkt 7.4.3) vil Fylkestinget:

- tilrå at prinsippet om "vern gjennom fornuftig bruk" vert lagt til grunn som forvaltingsprinsipp i verneområde, og at det vert opna for regionale tilpassingar og prioriteringar innanfor arealvern og bruk av arealressursar.

- støtte mindretallet sitt framlegg som peikar på at rovdyrpolitikken i større grad enn i dag må ivareta bygdene sine behov for å utnytte lokale utmarksressursar.

- støtte dei samrøystes tilrådingane på landbruk, men gå mot forslag til omdisponeringar av landbruksstøtte slik eit fleirtal i distriktskommisjonen går inn for. Eventuelle reduksjonar i det samla produksjonstillegget til landbruket, for eksempel som følgje av nye internasjonale reglar, bør kanaliseras til landbruk og bygdeutvikling. Dersom ikkje detter er mogleg bør midlane bruast til andre utviklingstiltak i dei områda som vert ramma.



- støtte dei samrøystes tilrådingane innan fiskeri- og havbruk. Fylkestinget støttar ei utvikling i fiskeflåten som byggjer på dei konkurransefortrinn nærleik til ressursane representerer med desentralisert struktur med mange små og mellomstore einingar. Det skal framleis leggjast til grunn at Noreg skal føre ein nasjonal fiskeripolitikk, utan regionalisering når det gjeld kvotar med vidare. Råfisklova og deltakarlova bør oppretthaldast og vidareutviklast.

- støtte dei samrøystes/fleirtalstilrådingane innanfor sektorane reiseliv, elektrisk energi, industri, petroleum, tenesteytande "nye" næringar og lokalisering av offentleg verksemd.

Lokalisering av statlege, regionale og kommunale arbeidsplassar bør brukast aktivt for tilføre lokalsamfunn og regionar nye utviklingsressursar i form av arbeidsplassar, kompetanse og fagmiljø.

Fylkestinget støttar tilrådingane i høve auka innovasjon og nyskaping (pkt 7.4.4) Ein vil særskilt påpeike det viktige i å vidareutvikle høgskulane og dei regionale forskingsmiljøa og å sikre grunnlag for ein entreprenørskapskultur på alle trinn i utdanningsløpet. Fylkestinget støttar Distriktskommisjonen si samla tilråding i høve kapitaltilgang i distrikta.

Fylkestinget støttar fleirtalstilrådingane i pkt 7.4.5 og vil spesielt understreke kravet om å få balanse i kommuneøkonomien og forhandlingsrett mellom kommunane og staten i høve nye oppgåver. Inntektsystemet til kommunane må ta utgangspunkt i at distriktskommunar skal kompenseras for ekstra kostnader i høve demografi og avstand. Alle kommunar bør framleis vere generalistkommunar, men kan spesialisere seg gjennom samarbeid om oppgåveløysing.

Fylkestinget støttar dei samrøystes tilrådingane i høve samferdsle og annan infrastruktur (pkt 7.4.6), og vil spesielt understreke at det offentlege må ta ansvar for å få bygd ut IKT-infrastuktur i heile landet. Ferjene må på sikt bli gratis.

Fylkestinget støttar fleirtalet sine tilrådingar i høve geografisk differensierte verkemidlar (pkt 7.4.7) og vil spesielt påpeike Distriktskommisjonen og Effektutvalet sine tilrådingar om at den smale distriktpolitikken må tilførast meir økonomiske ressursar.

Fylkestinget vil tilrå at det vert oppretta eit nasjonalt senter for småsamfunnsutvikling, lokalisert til Sogn og Fjordane. Senteret skal m.a. drive nettverksbygging og positiv erfaringsutveksling mellom småsamfunn og kan utpeike pilotbygder som får spesiell oppfølging ein periode.

Fylkestinget viser til Effektutvalet (NOU 2004:2) si påpeiking av at innsatsen på dei distriktpolitiske områda er sterkt redusert på dei fleste område dei siste ti åra. Utvikling av livskraftige distrikt og regionar må sjåast som investering for framtidige inntekter i vår nasjonale økonomi. Råmene for den smale distriktpolitikken må difor aukast og distrikts- og regionalpolitiske mål må gjevast økonomisk oppfølging i sektorpolitikane.

3. Det lokale sjølvstyre må grunnlovsfestast.
4. Dei oppgåvene og verkemidla som er avgjerande for den regionale utviklinga må ligge på regionalt nivå. Sogn og Fjordane fylkeskommune viser til fylkestinget sitt vedtak av desember 2004 om at fylkeskommunane på Vestlandet - i regi av Vestlandsrådet - saman bør utarbeide eit framlegg til innhald for "eit sterkt regionalt folkevald nivå". Denne tek

mål av seg til ei ytterlegare presisering av framtidig oppgåveportefølje som må ligge til eit sterkt regionalt folkevald nivå. Fylkestinget viser elles til vedtak i fylkestingssak nr. 002/05.

5. Det er ein føresetnad at mynde og midlar må følgje oppgåvene, slik at regionar og kommunar vert i stand til å ivareta sitt ansvar. Dette vil, for dei ulike oppgåvene, variere med omsyn til totalansvar, bestillaransvar og samordningsansvar.
6. Sogn og Fjordane fylkeskommune vil streke under at nærleiksprinsippet – at offentlege avgjerder vert teke så nær dei det vedkjem som mogeleg - bør leggest til grunn for oppgåvefordelinga. Dei oppgåvene som kan leggest til kommunane bør desentraliserast til lokalt nivå. Det er viktig at kommunane får eit økonomisk grunnlag til å kunne vere ein aktiv utviklingsaktør.
7. Det må leggest opp til ei styrka samordning innanfor faste geografiske grenser av statleg sektorpolitikk på regionalt nivå. Staten si regionale organisering må tilpassast den eventuelle nye inndelinga i folkevalde sterke regionar.
8. Endring av fylkesgrensene med sikte på eit styrka regionalt direkte folkevalt nivå på bekostning av statleg mynde kan berre skje etter grundig debatt i dei berørte kommunar og tilslutnad i gjeldande fylkeskommunar. Som ledd i den lokalpolitiske debatten kan folkerøysting vere eit eigna verkemiddel. Statens rolle i prosessen vil vere å klargjere oppgåvefordelinga mellom statleg og regionale nivå. ”

I saksførelegget heiter det:

”KRD har gjeve to ulike tidsfristar for fråsegner til utgreiinga. For dei delene som gjeld framtidig fylkes- og kommunestruktur, oppgåvefordeling og maktfordeling/regionalisering er fristen sett til 14. oktober 2005. Departementet viser i den samanheng til gjennomføringa av ei forskingsbasert evaluering av fylkeskommunane som skal gjennomførast neste stortingsperiode.. For dei andre delene av utgreiinga til Distriktskommisjonen er fristen til fråsegn sett til 14. januar 2005. Desse delene av utgreiinga vil departementet følgje opp i ei stortingsmelding om regionalpolitikken som skal leggest fram våren 2005. Meldinga vil også omfatte ei vurdering av fylkeskommunen som regional utviklingsaktør.

Fylkesrådmannen ser det naturleg å sjå heile utgreiinga frå Distriktskommisjonen under eitt. I ei vurdering av arbeidet er det vanskeleg å gjere ei slik inndeling som departementet gjer framlegg om. Kommisjonen målber også at rett organisering av offentlig sektor i seg sjølv er eit viktig grunnlag for ein effektiv distrikts- og regionalpolitikk.”

Saksførelegget følgjer vedlagt.

Med helsing


Per Drageset
fylkesrådmann

Vedlegg: Saksførelegg i sak "NOU2004:19 "Livskraftige distrikter og regioner" - fråsegn

Mottakar (ar)

Kommunal- og regionaldepartementet, Postboks 8112 Dep, , 0032 OSLO

Kopi til:

KS

Fylkeskommunane